



官常典第一百九卷

三恪部彙考一

上古

黃帝有熊氏封榆罔於路 按外紀榆罔帝裏之曾孫也居於空桑爲政東急乘人而闕其捷於是諸侯攜貳其臣蚩尤作亂帝遜居於涿鹿有熊國君曰公孫軒轅實懋聖德諸侯歸之帝之立五十五年諸侯尊軒轅爲天子封帝於路 按路史炎帝參盧是曰榆罔居空桑黃帝時爲有熊氏實懋聖德參盧禮於熊黃帝乃封參盧於路而崇炎帝之祀於陳 注元和姓纂云黃帝封榆罔支子於路

有虞氏

帝舜封帝堯子朱于房待以賓禮 按書經益稷夔曰憂擊鳴球搏拊琴瑟以詠祖考來格虞賓在位 按竹書紀年帝子丹朱避舜於房陵舜讓不克遂封朱於房爲虞賓三年舜卽天子之位 按通志帝舜踐天子位卽位之明年封丹朱於丹淵爲諸侯以奉先祀服其服禮樂如之謂之虞賓

示弗臣也

按路史帝堯初取富宜氏曰皇生朱鰲假媚克兄弟爲鬪鬻訟嫚游而朋淫帝悲之

爲制弈棋以閑其情使出就丹帝崩虞氏國之於房爲房侯以奉其祀服其服禮樂如之謂之虞賓

天子弗臣

注

竹書云放帝丹朱於丹水今朱虛縣有丹山東丹西丹二水水近有長坂遠峻謂之

破軍坡記爲丹朱弄弈之所韻云舜封丹朱爲房邑侯今荆河之吳房相圖經引孟子注舜封丹

朱於白水白水乃今清河蓋夏封之在鎮西南三里有丹朱陵南八里有帝子夜遊臺周二百步

相臺志云丹朱嫚遊之地

夏后氏

帝禹封帝堯子丹朱於唐帝舜子商均於虞

按史記五帝本紀禹踐天子位堯子丹朱舜子商均

皆有疆土以奉先祀服其服禮樂如之以客見天子天子弗臣示不敢專也

注

譙周曰以唐封堯

之子以虞封舜之子索隱曰漢書律曆志云封堯子朱於丹淵爲諸侯商均封虞在梁國今虞城

縣也正義曰括地志云定州唐縣堯後所封宋州虞城縣舜後所封也

按陳世家昔舜爲庶

人時堯妻之二女居於嬀汭其後因爲氏姓嬀氏舜已崩傳禹天下而舜子商均爲封國夏后之

時或失或續

注

索隱曰按商均所封虞卽今之梁國虞城夏代猶封虞思虞遂是也

按通鑑

前編注帝舜有虞氏妃女嬀生義均及季釐均封商今商之商洛有堯女墓武關西北百二十里商城是也禹封其子於虞季釐封於緡其後爲夏桀所克

按路史帝禹禘黃帝而封丹朱唐商均

之子於虞作賓王家

注

天子弗臣謂不以臣禮責君臣之義固定故云作賓者異於諸臣矣

帝少康元歲諸侯來朝賓虞公

按竹書紀年云云

帝少康二十二歲帝奔虞虞君思妻之二女

按左傳哀公元年伍員曰少康爲仍牧正赫澆能戒

之澆使椒求之逃奔有虞爲之庖正以除其害虞思於是妻之以二姚而邑諸綸有田一成有衆一旅能布其德而兆其謀以收夏衆撫其官職

按通鑑前編少康二十二歲自有仍奔虞虞君思

妻之二女

商

湯有天下封虞之後于遂夏之後于夏亭

按左傳昭公三年晏子曰箕伯直柄虞遂伯戲其相胡

公大姬已在齊矣

注

四人皆舜後陳氏之先

昭公八年史趙對晉侯曰自幕至于瞽瞍無違命舜重之以明德寘德於遂遂世守之及胡公不淫故周賜之姓使祀虞帝

注

遂舜後蓋殷之興存舜之後而封遂言舜德乃至於遂

疏

三年傳云箕

伯直柄虞遂伯戲則遂在直柄之後故云蓋殷興存舜之後而封之也言舜有明聖之德其德流及於遂

按史記夏本紀夏桀召湯而囚之夏臺已而釋之湯修德諸侯皆歸湯湯遂率兵以

伐夏桀桀走鳴條桀謂人曰吾悔不遂殺湯於夏臺使至此湯乃踐天子位代夏朝天下湯封夏之後

注

正義曰括地志云夏亭故城在汝州郟城縣東北五十四里蓋夏后所封也

按路史遂

舜裔也夏之世有箕伯直柄伯戲中衰成湯寘之於遂遂世守之

注

莊公十二年齊桓滅之左氏

正義及風俗通云商封之于遂袁良碑云世本陳遂舜後虞思後箕伯直柄中衰湯封遂於陳以後舜

周

武王克殷有天下封虞後于陳夏後于杞殷紂子武庚于殷

按史記周本紀武王十一年伐紂封

商紂子祿父殷之餘民武王爲殷初定未集乃使其弟管叔鮮蔡叔度相祿父治殷罷兵西歸追思

先聖王乃褒封帝舜之後於陳大禹之後於杞

注

正義曰括地志云陳州宛丘縣在陳城中卽古

陳國也帝舜後遏父爲周武王陶正武王賴其器用封其子嬀滿於陳都宛丘之側汴州雍丘縣

古杞國地理志云古杞國理此城周武王封禹後於杞號東樓公二十一代爲楚所滅

按陳

杞世家陳胡公滿者虞帝舜之後也昔舜爲庶人時堯妻之二女居於嬀汭其後因爲氏姓姓嬀氏

舜已崩傳禹天下而舜子商均爲封國夏后之世或失或續至於周武王克殷紂乃復求舜後得嬀

滿封之於陳以奉舜祀是爲胡公

注

索隱曰按左傳虞遏父爲周陶正以服事武王杜註遏父舜

之後陶正官名是生滿者也左傳又曰武王以元女太姬配虞胡公而封之陳以備三恪

杞東樓公者夏后禹之後苗裔也殷時或封或絕周武王克殷紂求禹後得東樓公封之於杞以奉

夏后氏祀

注

索隱曰杞國名也東樓公諡號也不名者並史先失耳宋忠曰今陳留雍丘縣故地

理志云雍丘縣故杞國周武王封杞後爲東樓公是也蓋周封杞而居雍丘至春秋時杞已遷東

國故左氏隱四年傳云莒人伐杞取牟婁牟婁者東邑也僖十四年傳云杞遷緣陵臣瓚云卽春

秋緣陵淳于公所都之邑又州國名杞後改國號曰州而稱淳于公故春秋桓五年經云州公如

曹傳曰淳于公如曹是也然杞後代又稱子者以微小又僻居東夷故襄二十九年經稱杞子來盟傳曰書曰子賤之也

成王三年周公討武庚誅之封微子啟於宋以紹殷後 按書經微子之命王若曰猷殷王元子惟稽古崇德象賢統承先王修其禮物作賓于王家與國咸休永世無窮嗚呼乃祖成湯克齊聖廣淵皇天眷佑誕受厥命撫民以寬除其邪虐功加于時德垂後裔爾惟踐修厥猷舊有令聞恪慎克孝肅恭神人予嘉乃德曰篤不忘上帝時歆下民祗協庸建爾于上公尹茲東夏欽哉往敷乃訓慎乃服命率由典常以蕃王室弘乃烈祖律乃有民永綏厥位毗予一人世世享德萬邦作式俾我有周無斃嗚呼往哉惟休無替朕命 按史記周本紀武王崩太子誦代立是爲成王成王少周公初定天下周公恐諸侯畔周公乃攝行政當國管叔蔡叔疑周公與武庚作亂畔周周公奉成王命伐誅武庚管叔放蔡叔以微子開代殷國於宋作微子之命

漢

武帝元鼎四年始封周子南君以奉周祀 按漢書武帝本紀元鼎四年冬十月幸行雍祠五時賜

民爵一級女子百戶牛酒行自夏陽東幸汾陰十一月甲子立后土祠於汾陰脽上禮畢行幸滎陽還至洛陽詔曰祭地冀州瞻望河洛巡省豫州觀於周室邈而無祀詢問耆老迺得孽子嘉其封嘉爲周子南君以奉周祀 按外戚恩澤侯表姬嘉以周後元鼎四年十一月封爲周子南君邑三千戶

元帝初元五年春正月以周子南君爲周承休侯位次諸侯王 按漢書元帝本紀云云 注文穎

曰姓姬名延年其祖父姬嘉本周後武帝元鼎四年封爲周子南君令奉周祀師古曰承休國在潁川

成帝綏和元年詔封孔吉爲殷紹嘉公並進周承休侯爲公 按漢書成帝本紀綏和元年春二月

癸丑詔曰蓋聞王者必存二王之後所以通三統也昔成湯受命列爲三代而祭祀廢絕考求其後莫正孔吉其封吉爲殷紹嘉侯三月進爵爲公及周承休侯皆爲公地各百里 按梅福傳時成帝久無繼嗣福以爲宜建三統封孔子之世以爲殷後復上書曰臣聞不在其位不謀其政政者職也位卑而言高者罪也越職觸罪危言世患雖伏質橫分臣之願也守職不言沒齒身全死之日尸未

腐而名滅雖有景公之位伏歷千駟臣不貪也故願壹登文石之陛涉赤墀之塗當戶牖之法坐盡平生之愚慮亡益於時有遺於世此臣寢所以不安食所以忘味也願陛下深省臣言臣聞存人所以自立也壅人所以自塞也善惡之報各如其事昔者秦滅二周夷六國隱士不顯佚民不舉絕三統滅天道是以身危子殺厥孫不嗣所謂壅人以自塞者也故武王克殷未下車存五帝之後封殷於宋紹夏於杞明著三統示不獨有也是以姬姓半天下遷廟之主流出於戶所謂存人以自立者也今成湯不祀殷人亡後陛下繼嗣久微殆爲此也春秋經曰宋殺其大夫穀梁傳曰其不稱名姓以其在位祖尊之也此言孔子故殷後也雖不正統封其子孫以爲殷後禮亦宜之何者諸侯奪宗聖庶奪適傳曰賢者子孫宜有土而況聖人又殷之後哉昔成王以諸侯禮葬周公而皇天動威雷風著災今仲尼之廟不出闕里孔氏子孫不免編戶以聖人而歆匹夫之祀非皇天之意也今陛下誠能據仲尼之素功以封其子孫則國家必獲其福又陛下之名與天亡極何者追聖人素功封其子孫未有法也後聖必以爲則不滅之名可不勉哉福孤達又譏切王氏故終不見納武帝時始封周後姬嘉爲周子南君至元帝時尊周子南君爲周承休侯位次諸侯王使諸大夫博士求殷後分

散爲十餘姓郡國往往得其大家推求子孫絕不能紀時匡衡議以爲王者存二王後所以尊先王而通三統也其犯誅絕之罪者絕而更封他親爲始封君上承其王者之始祖春秋之義諸侯不能守其社稷者絕今宋國已不守其統而失國矣則宜更立殷後爲始封君而上承湯統非當繼宋之絕侯也宜明得殷後而已今之故宋推求其嫡久遠不可得雖得其嫡嫡之先已絕不當得立禮記孔子曰丘殷人也先師所共傳宜以孔子世爲湯後上以其語不經遂見寢至成帝時梅福復言宜封孔子後以奉湯祀綏和元年立二王後推迹古文以左氏穀梁世本禮記相明遂下詔封孔子世爲殷紹嘉公

哀帝建平二年益紹嘉公戶九百三十二 按漢書哀帝本紀不載 按外戚恩澤侯表云云

平帝元始四年春正月改殷紹嘉公曰宋公周承休公曰鄭公 按漢書平帝本紀云云

後漢

世祖建武二年夏四月封周後姬常爲周承休公 按後漢書世祖本紀云云 注 武帝封周後姬

嘉爲周子南君成帝封姬延爲周承休公常卽延之後承休所封故城在今汝州東北

建武五年春二月壬申封殷後孔安爲殷紹嘉公

按後漢書世祖本紀云云

注武帝封孔吉爲

殷紹嘉公安卽吉之裔也

建武十三年春二月庚午以殷紹嘉公孔安爲宋公周承休公姬常爲衛公

按後漢書世祖本紀

云云 按百官志衛公宋公本注曰建武二年封周後姬常爲周承休公五年封殷後孔安爲殷紹

嘉公十三年改常爲衛公安爲宋公以爲漢賓在三公上

注五經通義二王之後不考功有誅無

絕鄭元曰王者存二伐而封及五郊天用天子禮以祭其始祖行其正朔此謂通三統也三恪者敬其先聖封其後而已無殊異者也

魏

文帝黃初元年以漢帝爲山陽公行漢正朔不稱臣子皆爲侯

按三國志魏文帝本紀黃初元年

冬十一月癸酉以河內之山陽邑萬戶奉漢帝爲山陽公行漢正朔以天子之禮郊祭上書不稱臣
京都有事於太廟致胙封公之四子爲列侯

明帝青龍二年山陽公薨治喪追諡葬以漢禮

按三國志魏明帝本紀青龍二年春三月庚寅山

陽公薨帝素服發哀遣使持節典護喪事夏四月丙寅詔有司以太牢告祠文帝廟追諡山陽公爲漢孝獻皇帝葬以漢禮

按註獻帝傳明帝變服率羣臣哭之使使持節行司徒太常和洽弔祭又使持節行大司空大司農崔林監護喪事詔曰蓋五帝之事尙矣仲尼盛稱堯舜巍巍蕩蕩之功者以爲禪代乃大聖之懿事也山陽公深識天祿永終之運禪位文皇帝以順天命先帝命公行漢正朔郊天祀祖以天子之禮言事不稱臣此舜事堯之義也昔放勳殂落四海如喪考妣遏密八音明喪葬之禮同於王者也今有司奏喪禮比諸侯王此豈古之遺制而先帝之至意哉今諡公漢孝獻皇帝使太尉具以一太牢告祠文帝廟曰嚮聞夫禮也者返本脩古不忘厥初是以先代之君尊尊親親咸有尙焉今山陽公寢疾棄國有司建言喪紀之禮視諸侯王嚮惟山陽公昔知天命永終於已深觀歷數允在聖躬傳祚禪位尊我民主斯乃陶唐懿德之事也黃初受終命公於國行漢正朔郊天祀祖禮樂制度率仍漢舊斯亦舜禹明堂之義也上考遂初皇極攸建允熙克讓莫朗於茲蓋子以繼志嗣訓爲孝臣以配命欽述爲忠故詩稱匪棘其猶聿追來孝書曰前人受命茲不忘大功嚮敢不奉承徽典以昭皇考之神靈今追諡山陽公曰孝獻皇帝冊贈璽綬命司徒司空持節弔

祭護喪光祿大鴻臚爲副將作大匠復土將軍營成陵墓及置百官羣吏車旗服章喪葬禮儀一如漢氏故事喪葬所供羣官之費皆仰大司農立其後嗣爲山陽公以通三統永爲魏賓於是贈冊曰嗚呼昔皇天降戾於漢俾逆臣董卓播厥凶虐焚滅京都劫遷大駕於是六合雲擾奸雄熒起帝自西京徂唯求定臻茲洛邑疇咨聖賢聿改乘輶又遷許昌武皇帝是依歲在元楊皇師肇征迄於鶉尾十有八載羣寇殲殄九域咸乂惟帝念功祚茲魏國大啟土宇爰及文皇帝齊聖廣淵仁聲旁流柔遠能邇殊俗向義乾精承祚坤靈吐曜稽極玉衡允膺曆數度於軌儀克厭帝心乃仰欽七政俯察五典弗采四岳之謀不俟師錫之舉幽贊神明承天禪位祚建朕躬統承洪業蓋聞昔帝堯元愷旣舉凶族未流登舜百揆然後百揆時序內平外成授位明堂退終天祿故能冠德百王表功高岳自往迄今彌歷七代歲暨三千而大運來復庸命底績纂我民主作建皇極念重光紹咸池繼韶夏超羣后之遐蹤邈商周之慙德可謂高朗令終昭明洪烈之懿盛者矣非夫漢魏與天地合德與四時合信動和民神格於上下其孰能至於此乎朕惟孝獻享年不永欽若顧命考之典謨恭述皇考先靈遺意闡崇弘謐奉成聖美以章希世同符之隆以傳億載不朽之榮魂而有靈嘉茲弘休嗚呼

哀哉八月壬申葬於山陽國陵曰禪陵置園邑葬之日帝制錫衰弁絰哭之慟適孫桂氏鄉侯康嗣立爲山陽公 按王肅傳青龍中山陽公薨漢主也肅上疏曰昔唐禪虞虞禪夏皆終三年之喪然後踐天子之尊是以帝號無虧君禮猶存今山陽公承順天命允答民望進禪大魏退處賓位公之奉魏不敢不盡節魏之待公優崇而不臣既至其薨櫬斂之制與徒之節皆同之於王者是故遠近歸仁以爲盛美且漢總帝皇之號號曰皇帝有別稱帝無別稱皇則皇是其差輕者也故當高祖之時土無二王其父見在而使稱皇明非二王之嫌也況今以贈終可使稱皇以配其諡明帝不從使稱皇乃追諡曰漢孝獻皇帝

陳留王景元元年故漢獻帝夫人節薨追諡獻穆皇后 按三國志魏陳留王本紀景元元年夏六月己未故漢獻帝夫人節薨帝臨於華林園使使持節追諡夫人爲獻穆皇后及葬車服制度皆如漢氏故事

咸熙元年封漢帝禪爲安樂公 按三國志魏陳留王本紀景元四年冬十一月蜀主劉禪詣鄧艾降巴蜀皆平咸熙元年春三月丁亥封劉禪爲安樂公 按蜀後主傳炎興元年冬鄧艾破衛將軍

諸葛瞻於綿竹用光祿大夫譙周策降於艾艾至城北後主與禪自縛詣軍壘門艾解縛焚禪延請相見因承制拜後主爲驃騎將軍諸圍守悉被後主勅然後降下艾使後主止其故宮身往造焉明年春正月後主舉家東遷旣至洛陽策命之曰惟景元五年三月丁亥皇帝臨軒使太常嘉命劉禪爲安樂縣公於戲其進聽朕命蓋統天載物以咸寧爲大光宅天下以時雍爲盛故孕育羣生者君人之道也乃順承天者坤元之義也上下交暢然後萬物協和庶類獲乂乃者漢氏失統六合震擾我太祖承運龍興弘濟八極是用應天順民撫有區夏於時乃考因羣傑虎爭九服不靜乘間阻達保據庸蜀遂使西隅殊封方外壅隔自是已來干戈不戢元元之民不得保安其性幾將五紀朕永惟祖考遺志思在綏輯四海率土同軌故爰整六師耀威梁益公恢崇德度深秉大正不憚屈身委質以愛民全國爲貴降心回慮應機豹變履信思順以享左右無疆之休豈不遠歟朕嘉與君公長饗顯祿用考咨前訓開國胙土率遵舊典錫茲元牡苴以白茅永爲魏藩輔往欽哉公其祇服朕命克廣德心以終乃顯烈食邑萬戶賜絹萬匹奴婢百人他物稱是子孫爲三都尉封侯者五十餘人尙書令樊建侍中張紹光祿大夫譙周祕書令郤正殿中督張通並封列侯公太始七年薨於洛陽

注
漢晉春秋曰司馬文王與禪宴爲之作故蜀技旁人皆爲之感愴而禪嬉笑自若王謂賈充曰人之無情乃可至於是乎雖使諸葛亮在不能輔之久全而況姜維邪充曰不如是殿下何由井之他日王問禪曰頗思蜀否禪曰此間樂不思蜀卻正聞之求見禪曰若王復問宜泣而答曰先人墳墓遠在隴蜀乃心西悲無日不思因閉其目會王復問對如前王曰何乃似卻正語邪禪驚視曰誠如尊命左右皆笑蜀紀云諡曰思公子恂嗣 按通鑑綱目元帝咸熙元年禪舉家遷洛陽大臣無從者惟祕書令卻正及殿中督張通捨妻子單身從行正相導宜適舉動無闕禪乃慨然嘆息恨知正之晚魏封禪爲安樂公

晉

武帝泰始元年封魏帝爲陳留王並賜山陽安樂二公子弟爲駙馬都尉 按晉書武帝本紀泰始元年冬十二月景寅設壇於南郊百僚在位及匈奴南單于四夷會者數萬人升壇受禪禮畢卽洛陽宮幸太極前殿丁卯封魏帝爲陳留王邑萬戶居於鄴宮魏氏諸王皆爲縣侯己巳詔陳留王載天子旌旗備五時副車行魏正朔郊祀天地禮樂制度皆如魏舊上書不稱臣賜山陽公劉康安樂

公劉禪子弟一人爲駙馬都尉

泰始二年詔陳留王非有大事王官表上之有司奏魏宜用前代正朔服色罷山陽公國督軍按
晉書武帝本紀二年夏五月戊辰詔曰陳留王操尙謙冲每事輒表非所以優崇之也主者喻意非
大事皆使王官表上之秋九月戊戌有司奏大晉繼三王之蹤蹈舜禹之蹟應天順時受禪有魏宜
一用前代正朔服色皆如虞遵唐故事奏可冬十一月罷山陽公國督軍除其禁制

泰始三年山陽公來朝有司奏以陳留王山陽公衛公備三恪之禮按晉書武帝本紀三年冬十
二月山陽公劉康來朝按杜佑通典泰始三年太常上言博士祭酒劉憲等議漢魏爲二王後夏
殷周之後爲三恪衛公毀於前代爲二王後於大晉在三恪之數應降稱侯祭祀制度宜與五等公
侯同有司奏陳留王山陽公爲二代之後衛公備三恪之禮易稱有不速之客三人來此則以三爲
斷不及五代也

泰始四年增置山陽公官屬鼓吹車馬按晉書武帝本紀四年春二月庚子增置山陽公國相郎
中令陵令雜工宰人鼓吹車馬各有差